

四庫全書

史部

欽定四庫全書

平定兩金川方略卷四十七

正月癸巳溫福奏言臣自美諾攻克底木達以來
各寨投順番人不下數千除各頭人尚有形迹可
疑者拘禁訊究外其餘無關輕重之小頭人番民
察其壯健可用及自願出兵効力者三百餘名即
于頭人內酌給土弁職銜令其分領隨熟悉番情
之游擊馬詔蛟等以脩進勦似為有益惟查兩金

川人並不剃頭今既望風投順自應令其一體薙
髮俾奸宄易於稽察其隨營打仗之新順番人遵
旨與各土兵一例酌給口糧使伊等倍加感頌踴躍思
奮奏入報

聞

同日溫福又奏言西安提督哈國興隨臣帶兵攻
克布朗郭宗底木達等處即染患傷寒今於十二
月二十日病故查哈國興前奉

命總統西路陝甘官兵今既身故所有陝甘總兵張大
經富紳二人僅能管理本部兵弁而固原鎮總兵
李雲標又久病未痊其所帶陝甘兵二千餘名急
需幹員分管臣前此奉

旨總兵缺出令於頭等侍衛及叅領內揀選署理今有
叅領巴圖魯海祿在西北兩路出兵多年勇往明
幹所有李雲標總兵事務似可即令海祿署理至
李雲標應否開缺之處仍俟

諭旨遵行奏入

上諭內閣曰溫福奏提督哈國興在軍營病故哈國興
自前歲征勦緬匪以來頗屬勇往上年調赴四川西
路軍營擢任提督帶兵攻勦疊著勞績是以特加恩
授為叅贊大臣並將伊子用為守備現在小金川全
境蕩平正值進勦金川需人之際倚任方殷遽聞溘
逝深為軫惜著賞銀一千兩存卹其家並加贈太子
太保以示憫勞飾終至意所有應得卹典仍著該部

察例具奏

臣等謹按哈國興家世韜鈴於綠營提鎮中勞績頗著

皇上因其熟諳軍務兼習番情前此

特典參贊大臣已屬

特典乃旋邁沉疴遂至不起

皇上軫念前勞加恩格外厚其賞卹晉予官銜飾終之典至優極渥一時提鎮諸臣有不感激思奮者

乎

同日

上又諭內閣曰李雲標現在患病著開缺調理所有陝西固原鎮總兵員缺著海祿署理

同日溫福又奏言

臣

查金川黨惡助凶今小金川

全境蕩平乃敢容留僧格桑其悖逆之罪不可不

厲兵申討

臣

仰遵

聖訓迅速進攻昨與阿桂豐昇額就現有兵力通盤籌

議臣溫福等由哈爾薩爾進兵而阿桂等由當噶爾拉進兵均攻噶拉依直搗腹心至豐昇額由綽斯甲布進兵會同舒常逕攻勒烏圖制其要害臣等現在陸續商議進發謹先恭摺馳奏入報

聞

溫福又奏言查豐昇額由章谷吉地等處往綽斯甲布原議於董天弼隊內撥兵會合舒常辦理嗣緣董天弼之兵一時未能全到於臣西路兵內先

撥貴州及固原兵一千名並董天弼處先到之甘肅兵一千數百名交與豐昇額於十二月十八日帶領起程嗣有續到甘肅兵一千名亦令侍衛等帶領趕上行走其三雜谷土兵一千五百餘名由丹壩便道先赴綽斯甲布等候至從前大兵未底美諾及底木達之時小金川之南北境俱須防賊番抄截今各寨落次第收服東南北三面已非應防之後路現將李煦富紳調赴大營分管貴州陝

甘官兵協同進勦惟查美諾係糧運總匯酌議留
兵令松潘鎮總兵五福駐扎又曾頭溝堪卓溝水
了山大板昭一帶路通金川且僧格桑原從底木
達之美卧溝逃往恐賊酋見此處空虛從小路潛
來滋事是以酌撥兵二千名交與董天弼分駐要
隘並令其留駐布朗郭宗底木達等處防範後路
臣連日派人探訪據稱功噶爾拉係金川與小金
川交界其山雖與巴朗拉相似而形勢較為高峻

地氣亦屬陰寒

臣

審度事機刻難延緩業於十二

月二十二等日統兵啟行於簇拉角克溝之南帛
噶爾角克碕之北覓路逕赴牛廠前進較之回赴
美諾再趨功噶爾拉更為便捷奏入

上諭曰所辦俱妥佇俟捷音

甲午舒常奏言十二月二十日知府盛英帶領土
司工噶諾爾布來營據該土司稱索諾木畏懼已
於本月十七日將甲爾壘壩地方綽斯甲布舊碕

三座金川新碉三座暨附近甲爾壠壩之思根等處新舊碉五座一並退還現已派頭目土兵據守等語臣即面諭工噶諾爾布汝能實心出力督率土兵助攻將來承受

大皇帝恩澤正多伊聞言欣喜臣隨酌加獎賞去訖竊思索諾木遽退甲爾壠壩必因大兵壓境無所倚恃借此為勾結綽斯甲布之計若工噶諾爾布速令土兵助力進攻可使索諾木生疑失望奏入

上諭軍機大臣曰舒常奏索諾木將甲爾壟壩退出所辦深合機宜看來逆酋此舉自係聞大兵已破小金川即日移兵分路進勦而綽斯甲布一路現有官兵督率土兵進攻其意妄以為退還甲爾壟壩可圖目前完事且俟大兵撤後復出而侵佔豐昇額舒常即當明諭工噶諾爾布以此次進勦實為衆土司剪除後患不滅不休益堅其效順之心不復存顧畏之念方為妥善惟是金川番賊較之小金川狡謀更深其

於竊刼營盤抄截後路尤為長技前已詳悉傳諭溫
福等加意預防營中守禦宜嚴途次巡查宜順使賊
衆技無所施或賊冒死而來即當乘機盡殲大示懲
創庶不敢復為輕視且官兵漸次深入後路尤關緊
要一切餉道軍臺並須實力守護賊衆潛伺我後萬
一稍有疎虞成何事體此一節所關甚大溫福等各
路均當留心規畫調度得宜勉之慎之

同日舒常又奏言

臣謹奉

恩旨賞給兵丁一月鹽菜銀兩隨宣示兵衆無不歡欣感激至土練等亦應遵

旨辦理但緯斯甲布番兵三千六百名除派出看守隘

口外隨營者二千一百名

臣

查經打仗受傷者即

行賞給其未出力者扣除如此分別辦理庶

特恩不致濫邀進勒咸歸實濟奏入

上又諭軍機大臣曰舒常奏緯斯甲布隨營土練二千餘名察其出力不出力分別加賞所見雖亦近是但

令獨抱向隅未必能激其魏奮之志豐昇額舒常當
傳齊綽斯甲布衆土練諭以尔等隨征以來尚未見
實心出力本不應濫叨恩賞但此次大皇帝恩旨凡
隨營土兵槩行加賞我等因仰體大皇帝一視同仁
仍槩賞爾等嗣後惟當倍加奮勉以圖報効如此曉
諭番夷等既得加賞感而且畏向後自可冀其得力
同日劉秉恬鄂寶奏言小金川全境蕩平現在分
別三路剋期申討金川糧運最關緊要查從前美

諾未克西南道路不通是以軍糧半由南路轉運
今道路業已暢達一切糧運章程臣等公同籌酌
除功噶爾拉官兵仍從草坡鄂克什一路糧臺供
運外其當噶爾拉一路軍糧乾隆十二三年均由
西路餽送今若將南路打箭爐章谷之糧運至僧
格宗再行運往計自省至營共有四十四站所費
實多自不若西路運供之便但功噶爾拉官兵數
至二萬有餘需糧不少若當噶爾拉亦同取資于

此恐致擁滯查自成都由雅州木坪以至美諾計程已省二站且自成都以至桃關均須陸運而自成都以至雅州可通水路運費亦輕所有當噶爾拉軍糧即從木坪運至美諾僧格宗等處轉運營中不獨較之由打箭爐運往者所省為多即較之由桃關運出者尚有樽節查木坪臺站向歸西路今既以此路運供副將軍阿桂所統兵糧且該處亦與南路相近應即改歸

臣

劉秉恬管理至綽斯

甲布一路前此十二三年用兵不過一二千名軍
米本為易辦然彼時兼從丹壩設站輓運者亦以
由南路打箭爐至綽斯甲布計程有二千一百七
十餘里西路由三雜谷丹壩至綽斯甲布計程僅
一千零九十餘里核其腳價不啻倍蓰且南路站
長山僻不能安設內地人夫隨時僱用烏拉亦難
倚恃今此路增添官兵合計共有一萬六千餘名
目下所積軍糧僅敷一月之用臣等公同核計與

其多耗帑金為此難繼之局不如兩路並運轉收
節省之益而丹壩一途又有漢土官兵七百名在
彼防範即或加添護糧之兵亦屬無幾況三雜谷
一路現有臺站人夫以之移進丹壩尤屬易事臣

鄂寶於供支功噶爾拉之外兼辦丹壩運往綽斯

甲布軍糧

臣

劉秉恬供支當噶爾拉之外兼辦南

路運往綽斯甲布軍糧彼此趕辦不敢推諉貽誤

此外吉地丹東一路現有官兵六七千

臣

劉秉恬

於章谷存糧內督令源源運往亦足以供接濟奏

入

上嘉之

同日

上諭內閣曰小金川之地舊膺悉已蕩平現在將軍等
分路統兵乘勝直擣金川一切軍需自宜寬裕儲備
著再於部庫內撥銀五百萬兩發往川省備用

上又諭內閣曰甘肅提督馬全著馳驛前往四川派在

溫福軍營作為領隊大臣管理甘肅官兵

上又諭內閣曰西安提督員缺著馬彪補授

乙未阿桂豐昇額奏言竊臣阿桂一抵布朗郭宗

即與臣豐昇額會同溫福酌議三路分兵之局詳

悉具奏今臣等復奉

諭旨以綽斯甲布一路進兵須臣阿桂前往臣豐昇額

於各處番情均屬初辦在工噶諾爾布固為逆酋

親戚至如索諾木之母之妻皆係布拉克底土舍

安多爾之姊之女現在金川其安多爾又娶索諾
木之姑現在木拉克底均係世為婚姻臣豐昇額

即帶領當噶爾拉一路官兵亦須駕馭巴旺布拉

克底之人始得其力彼中情形尚未深悉況小金

川既滅今又分道進攻金川臣豐昇額現統漢土

官兵督勦則金川之不滅不休工噶諾爾布諒亦

可揣而知現在舒常在緯斯甲布兩月有餘于該

處事宜漸次熟悉今若令臣豐昇額督率此路官

兵令舒常泰贊軍務似可以期得力臣等原定三路之功噶爾拉當噶爾拉兩路皆為進擣噶拉依之兵綽斯甲布一路為進擣勒烏圖之兵者原以噶拉依一帶地勢較險攻勦多費兵力至綽斯甲布一路則一得達爾圖日旁山梁向前賊進皆勢居下游稍易攻取三路中不論何處得手則他路均可得力臣等已撥定官兵其侍衛章京等亦皆酌量分派日內即當起程若再行會商更調

恐於進勦轉致稍稽應否仍照前奏辦理伏祈

訓示遵行奏入

上諭曰所奏均是佇俟奮勉成功以待酬庸茂典

同日阿桂又奏言十二月二十一日據音吉圖汪
騰龍等報稱職等每日令將備上南山梁察看賊
踪十七日酉刻見山下樹林內火起賊番紛紛潰
散當即統兵過河乘勢分攻山口在右賊番俱各
望風奔逸共計佔得大碉柵六座木柵二十三座

石卡六處殲賊五名等語二十二日又報稱職等
攻得正地溝口碉柵普濟保帶兵即赴甲爾壘壩
行至中途有綽斯甲布頭人安布差人迎稟已得
甲爾壘壩馳往查勘其地有碉六座現經綽斯甲
布土兵佔據稱工噶諾爾布派我帶兵千名來此
賊番見我執衆即便散去又離此六七十里之協
雅地方有碉三座我頭人生根亦已攻克等語臣
思草布什咱一路原與綽斯甲布官兵共綴金川

賊執今既攻得正地滿口甲爾壘壩即已控扼金川要隘其餘草布什咱各處防兵均可量為裁撤以資進勦業經飭令音吉圖等察看情形先行籌辦此內德爾格忒等處馬上番民素不長于步行越險進勦不能得力自應一併撤歸遊牧以節糜費並可備運糧烏拉之用惟查巴旺布拉克底之馬奈馬爾邦亦係乾隆十二三年進兵之路該處路通金川應即于草布什咱官兵內酌撥千名以

供駐守其餘官兵或可酌分當噶爾拉緯斯甲布
兩路統俟議定再行具

奏再查逆酋詭詐百出或因甲爾壘壩距巢穴稍遠
守禦較難陽為退地乞憐其實撤聚賊衆另踞要
險亦未可知臣仰賴

天威惟有矢志掃除凶孽此等伎倆斷不為其所惑亦
以告知豐昇額囑其前往該處駕馭斯甲布土
司使知大兵必滅金川庶該土司等不以退地而

心生觀望奏入報

聞

同日阿桂又奏言查別斯滿地方共有五寨其二寨先經撫定此外三寨有兩金川賊人監守是以衆番等未敢遽投嗣臣即令已投二寨之番民前往招撫該番民等遂與監守賊番接仗其未投之三寨番民從中接應殺死監守賊番並據該番等稱我等看見雜谷百姓自改作屯練以來各安生

理土司不敢欺凌今歸順

天朝不願分給各土司只求改作屯練等語臣查別斯
滿原係另一土舍其地在鄂克什三雜谷小金川
之間與維州協所屬屯練界址相連十三年金川
事竣後岳鍾琪任意辦理將該土舍地方徑行賞
給小金川小金川因非同類派累獨重現在該處
精壯番民多被逆苗派出打仗陣亡僅存老幼婦
女五百名口是以該番等心存畏懼不願分給各

土司所請改為屯練之處實出真情臣等現已准
行檄調五福查禮前來經理至汗牛十四寨先已
歸順茲據前往招撫之明正土司甲爾叅得沁親
帶十四寨頭人來營報稱各寨內共有三百七十
一户老幼婦女一千九百四十餘名口臣亦面為
曉諭令其汰精壯者隨征復酌賞頂帶綢布等物
該頭人等極為感悅仍令明正土司赴彼彈壓將
來統歸五福查禮接辦奏入報

聞

同日阿桂又奏言 臣欽奉

諭旨土弁雍中爾結色勒奔著賞巴圖魯號仍加守備
頂帶獎賞花翎查巴旺與布拉克底本屬一家巴
旺係土司其布拉克底乃係土舍向來未經領受
印信號紙此次隨征小金川極為出力並懇將來
加恩受以土司之職 臣仗思川省西南邊外各土
司形勢必宜衆建而分其力擬于軍務竣後酌量

奏請是以前此仰荷

聖恩賞給該土舍花翎

臣

因其未有頂帶酌照土著司

例給與空頂以示鼓勵第土舍甫有空頂花翎而

土弁亦即賞戴花翎恐番人等不知分量稍生滿

足之心轉懈奮往之志

臣

現將加銜賞號

諭旨先為宣示所賞花翎察其此後出力如何再為請

旨又臣另摺欽奉

諭旨雅瑪應賞藍翎以示旌獎並應酌賜銀兩查雅瑪

係小金川邦甲小頭人擒獲時自懇前往招降故
未加誅戮伊即奮勉受傷固為可取今遵

旨酌賞銀十兩並給土千總目頂所有藍翎亦請停緩
以待將來又臣奏攻克僧格桑陣亡新附番人二
名亦奉

旨照土名再減半賞給但候部議准卹未免時日稍稽
轉不足鼓勵隨營番衆使之觀感興起臣已即時
加賞使番人等見目前出力致命之人立蒙

賜卹自必更圖努力奏入

上是之

同日

上諭軍機大臣曰阿桂奏攻得正地甲爾壘壩一帶可
以控扼金川要隘留兵防守亦為要務阿桂業已洞
悉形勢自能妥辦又另摺奏別斯滿五寨降番改作
屯練既出伊等情願事屬可行餘仍遵照節次所降
密旨籌辦又另摺奏土弁不宜即賞花翎所見亦是

應如所奏辦理但其中有尚須斟酌者如溫福一路出力土弁內並無戴翎之人即可照此奏留俟伊等奮勉立功再加獎勵設溫福軍營已有賞翎之人恐不免相形生懈則又不當靳此恩施著阿桂即札詢溫福畫一辦理

同日阿桂又奏言

臣仰荷

天恩授為定邊右副將軍並給與印信計福康安抵西路軍營即可將溫福現用之右副將軍清篆印信

移交前來臣所署四川提督印信應交與何人相應請

旨奏入

上諭曰仍交董天弼

丁酉鄂寶奏言大兵攻克美諾現在分路進勦運糧臺站至闊緊要除綽斯甲布一路已飛飭原任松茂道查禮等將堪卓滿等處臺站裁撤移設于梭磨至丹壩一帶其自美諾至喀爾薩爾計程五

站有餘大營每日軍糧約須二百五十餘石背運人夫每站約須五六百石加以轉送火藥軍裝等項在在需人雖准督臣文綬撥夫二千名實不敷用而目下又尚未到齊臣因安站緊要隨于沿途站所就近抽撥復于肩挑貿易民人內勸諭召募為數總屬無多臣惟有竭力趕運固不敢驟期有餘逐日供支亦不敢致有缺乏現已移催文綬將所派夫二千名促令作速到站並令多催人夫趕

送來營以備分撥奏入

上諭軍機大臣曰糧運為軍營要務自應妥速籌辦但前此官兵由西南兩路分進是以令劉秉恬鄂寶分路督運今小金川全境蕩平運道多已改歸西路與彼時情形迥不相同伊等自應協力同心酌量辦運况劉秉恬已授為總督糧員皆其所屬呼應更靈嗣後辦理糧務著劉秉恬與鄂寶合而為一不必更作分辦之名至三路糧運道路情形非朕所能懸度總

在伊二人察其遠近緩急熟籌全局隨宜措置務使
裹帶寬餘膚功速奏其應由富勒渾在內地督催接
濟者仍遵前旨妥協經理

戊戌溫福奏言

臣

于十二月二十六日帶兵抵工

噶爾拉山下之牛廠地方察看形勢見牛廠之前
工噶爾拉之下賊番立有大卡五座當派額森特
阿爾素納普爾普等帶兵二千名作為頭隊李煦
巴朗德爾森保巴雅爾等帶兵二千名作為二隊

臣督兵隨後接應因賊卡在山腰處恐其先有知覺額森特等乘夜雪迷離直前攻撲賊見官兵執盛遂逃赴工噶爾拉碉卡之內並力拒守查工噶爾拉巒嶂峻增皆如劍鋒刀刃與巴朗拉路頂宗相似惟中有了口僅如一綫羊腸而碉卡排立盡據險要詢之小金川降人據稱兩金川原與工噶爾拉山為界舊時金川在了口兩旁祇修有大碉二座因去冬大兵攻逼巴朗拉又添修碉卡數十

座為防守等語臣與各領隊詳加籌酌仰攻非易
且連日嚴寒山陰積雪深至四五尺官兵現已佔
住半山自應先用大砲轟摧再以兵力攻撲方能
得手臣現在飛調所存美諾明郭宗等砲位並令
熟悉路徑番跣探路徑以期速抵喀爾薩爾直搗
噶拉依再官兵自抵布朗郭宗裹糧本屬無多今
已過牛廠所帶五日口糧食用殆盡而新設各寨
尚未能源接運查侍郎鄂實現駐米諾臣已飛

咨籌辦總俟砲位一到兵糧稍敷即速相機前進
奏入


上諭軍機大臣曰溫福奏攻勦功噶爾拉情形一摺所
辦俱合機宜此等險隘處所賊衆必於最要之地併
力拒守官兵進攻時自當示以不測指東擊西使賊
人難于照顧或可易于得手

同日溫福又奏言據鄂克什土司帶領從金川出
來之鄂克什番人山扎勒塔爾赴營呈出索諾木

稟帖一封臣即譯出大槩總以並未幫兵狡詞支
辯至僧格桑竄匿一節並無一語提及又詢據山
扎勒塔爾供稱僧格桑從美卧溝逃竄之後即砍
伐樹木塞斷道路等語臣詳加體察該番所供自
係應有之事而索諾木來投此稟藉以試探軍情
尤為可惡所有原稟譯出並山扎勒塔爾供詞另
呈

御覽奏入報

聞



平定兩金川方畧卷四十七

欽定四庫全書

史部

平定兩金川方略卷四十八至五十

員外郎_臣 顧宗泰覆勘

總校官原任侍講_臣 王燕緒

欽定四庫全書

平定回疆方略卷四十八

正月己亥

上諭軍機大臣等現在三路進兵應需糧餉最關緊要

昨據溫福奏僅募五千人糧食用殆盡深為廑念今此

路軍糧曾否繼運無從著劉秉恬等妥協趕辦又曾

頭溝一路董天弼向由此進兵今小金川雖已蕩平

而此一帶實為官兵後路萬一逆酋潛令賊眾軼出

抄截我後於糧運軍臺略有疎虞成何事體再昨據
溫福訊取賊番供詞內有僧格桑由美卧溝逃往金
川復將此路隘口用樹木欄斷等語此甚可疑雖似
賊酋懼官兵進勦堵塞路徑但此等要隘處我進較
難賊出甚易安知非賊酋詭計借欄阻追兵為名俟
官兵一過仍由美卧溝而出復佔據布朗郭宗底木
達等處所關不小溫福等勿勿進兵於此等緊要關
鍵未能籌度萬全朕偶念及中心甚為不懌劉秉恬

現駐美諾辦理一切軍務董天弼又駐布朗郭宗經
理降番諸事所有防範機宜乃伊二人專責著將美
卧溝及曾頭溝兩路酌量形勢選派幹練脩弁帶兵
駐守以防賊衆滋事其他有類此要隘之處亦著一
體要辦或美諾兵數不敷撥派川者尚有可調之兵
即著劉秉恬等悉心經理總期於事有益不可惜費
臣等謹按美卧溝等處路通促浸昨賊番所供
僧格桑由此竄入併堵塞隘口情形溫福等倉

猝進兵未能籌度萬全一經

聖明燭照周詳訓示舉賊番窺伺情形早已瞭同指掌
且此等要隘處我進較難賊出甚易其攔截徑
路中懷叵測因令派撥幹練官兵嚴加駐守並
飭將似此要隘地方調兵分駐堵禦即多費有
所不惜其後賊酋果勾通小金川降番從美卧
溝潛出紛擾未事之先一一皆如

睿照益欽

勝算幾先無微不至也

庚子阿桂奏言

臣

自抵僧格宗後即令土弁土兵

前往蹣探看得自納木覺爾宗溝口上山約行四十餘里即係納圍納札木自此向北上山約三十餘里大嶺一道遠與功噶爾拉相聯即係當噶爾拉為金川界址向年此一帶積雪甚深茲仰叨

皇上福佑冬日晴煦陽坡不過數寸不至有礙於進兵
惟山勢極峻又堅礪十四座排立兩峯了口間守

禦甚為嚴密一得此嶺則金川各處皆出其下但嶺下險坡有林箐二十里冰雪頗大再進卽金川之克舟九寨等處地稍寬敞查僧格宗河東河西地方及汗牛十四寨雖均投順究係新經撫定而此一帶通金川之路又多且僧格宗納木覺爾宗係糧運總匯必須大員經理留兵防範且令總兵張玉琦駐彼一切轉運遞送事宜均歸管理以重責成並令成都副都統舒經安原任副都統鐵保

帶領成都滿兵四百餘名駐紮木覺爾宗溝口以資接應臣帶領漢土兵一萬二千餘人統率前進並知會劉秉括催趙軍糧數百石先為裹帶之需隨即設站運供期無匱乏臣思此路官兵自破翁古爾壘以來摧礪殺賊奮勇實倍於常金川賊衆諒已久經喪膽但前次金川係兼勦而此後係專辦當移兵之始必須確操成算先得一二勝仗攻取一二要隘以奪其氣嗣後即可迎刃而解臣察

看軍心均屬踴躍士氣亦覺奮揚實為私心竊喜
今將屆初春向前日暖綠營兵衆更易展施而賊
番春耕有悞勢難久於支拒奏入報

聞

同日阿桂又奏言臣等現在分兵三路進勦金川
僧格桑雖經噉走而大兵合力奮攻一經掃穴兩
酋即可並擒惟是僧格桑逃竄及金川容留情形
亦必須偵探籌辦臣近令巴旺布拉克底番人前

往密查據伊回稱探得索諾木居位嚕拉依其兄
喇嘛莎羅奔等皆在勒烏圍僧格桑携妻妾至彼
隨行尚有二三百人同住勒烏圍官寨莎羅奔傳
集衆頭人商議時有山丹綽爾嘉勒係郎卡手下
年老頭人言

天朝來勦小金川爾等幫同抗拒傷死多人不能占得
寸土今又收留僧格桑

天朝必不肯饒此時速行送出庶幾免罪其餘衆頭人

言僧格桑本屬一家來此投生非來送死如何可
以送出莎羅奔從衆留住又稱索諾木年纔十九
印信號紙皆其兄喇嘛等掌管等語臣查郎卡有
子五人長二三係前妻所生其索諾木及第五子
係後妻所出聞從前郎卡欲以索諾木承襲土司
大頭人中有言不應立者郎卡置之於死今索諾
木雖現為土司頭人未必各能悅服以情勢揆之
金川必終歸殄滅臣惟有乘勝進攻速圖藏事奏

入

上諭曰今固不敢為滿足之言若賴

上天慈恩速成此事實千古未有之績也勉之以待酬
勲厚典

同日劉秉恬奏言

臣

前因小金川全境蕩平副將

軍阿桂帶兵由當噶爾拉一路進攻

臣

亦即於十

二月二十四日回至僧格宗料理一切今仰蒙

聖訓令臣駐札美諾督理糧運及經理降番事務於一

二日內將僧格宗應辦之事布置妥協告知臬司
李世傑即赴美諾伏思此項降番俱係畏威懾服
原非歸順者可比誠如

聖諭其隨營者自應與土兵一例辦理其不隨營者斷
無取給內地米糧俾資養贍但既有以不死即當
令其自生始可廣招徠而清邊徼查美諾為小金
川居中之地俟臣到彼後應督同鎮道等將各寨
逐一清釐並曉諭各寨首乘此應行布種之時令

老幼婦女人等照常耕作其力有不能者或聽其
下壩傭工或酌量給予籽種使番衆均有莊稼可
應田土可依則現在歸徠者可保其永無他心其
從前逃往金川者知伊父母妻子依然無恙必將
聞風而至且使金川番民知

天朝寬大當必去逆効順人人解體於軍務似有裨益
奏入

上嘉之

甲辰

上諭內閣曰富勒渾查審阿爾泰貽誤軍務及勒屬派
買短發價值得受屬員餽送收回應扣養廉各款俱
已自認不諱實出情理之外阿爾泰自山東巡撫擢
授四川總督以來初於地方政務尚屬認真至小金
川與鄂克什構釁一節親見僧格桑之桀驁不馴並
不及早籌辦以除凶孽轉將鄂克什地方斷給小金
川致逆豎得以藉口益肆鴟張阿爾泰惟圖遷就完

事仍以僧格桑遵約歸巢之詞欺飾入告而於金川之父子濟惡槩不致問既將土司印信輕給郎卡及索諾木遣人赴藏仍援給照護行並為逆酋所藐視兩金川遂爾狼狽為奸梗化拒命是兩金川之事阿爾泰實屬養癰貽患然朕猶念其宣力有年特賞散秩大臣銜在軍營督辦糧運真可收效桑榆乃伊仍不知感激圖報當大兵深入之際於接運糧石動輒稽延甚至遇有軍營催糧公牘妄以受代為詞竟不

啟視其罪尤無可逭然亦不即加窮詰今復種種劣蹟衆証確鑿是阿爾泰之在川狼藉已無疑義軍機大臣會同三法司核議富勒渾原奏照有心貽誤軍機例擬以斬決於罪固為允當但阿爾泰前此之希圖了事因循諱飾實因朕不欲窮兵黷武屢諭妥辦遂爾意存將就尚非伊之敢於逞私僨事朕於賞罰權衡一本大公至正况事關軍務乎惟是阿爾泰經朕加恩用為總督簡任大學士乃以老而貪得易轍

改弦婪受所屬多賍甚敢懷私薦舉藉以侵動庫項
似此簠簋不飭若復貸其一死將何以任用督撫使
知儆惕乎但念其曾任大學士加恩免其肆市賜帛
自盡即著富勒渾傳旨監看以為大臣負恩貪黷者
戒將此通諭中外知之

臣等謹按金川自侵擾丹壩草布什咱以來屢
起釁端彼時即興師問罪亦為兵出有名

皇上念蠻觸相爭不欲遽為申討誠以

天戈所指不數年間準夷回部二萬里而遙胥歸版
藉於此彈丸黑子豈足煩戎行致蹈佳兵之
戒使爾時阿爾泰仰承

聖意於兩金川未經跋扈之前示之以威折之以義又
奚至於養靡貽患惟其因循姑息親見僧格桑
之桀驁不馴索諾木之父子濟惡匿不奏聞馴
至跳踉猖獗而

大聖人仁育之心不得不轉而出於義正是皆阿爾泰

欺飾釀成其罪實不能為之曲諱也

丙午溫福奏言

臣

察看功噶爾拉形勢懸崖一綫

仰攻殊為費力必須用砲轟摧力可相機攻撲

臣

所調砲位因山路險窄僅送到四號砲二尊而砲局銅斤物料亦未運至查賊番所築大碉多在山坳曲折之處層巒遮蔽自下而望僅見碉尖恐砲力不能徑到必須逼近賊碉佔據高處修築砲臺向下施放方能得力至自美諾至牛廠新設站夫

由內地催覓一時未能全到臣現於駐防後路各卡內抽撥兵弁及所有長夫餘丁俱令前赴美諾背運米石自可接濟奏入

上諭曰所籌皆妥自當如此

同日文綬奏言

臣

前因將軍溫福等由美諾分路

進勒金川即自省起程趕赴西路恐添催之夫或不濟事隨於沿途各站抽調人夫催趙糧運於十二月二十八日馳至美諾會同鄂實悉心商辦隨

抵軍營與溫福熟籌務期兵糧充裕足敷進剿之
用至副將軍阿桂一路之糧亦現由美諾協濟仍
飭臬司李世傑將卡了達烏等站存米趕送應用
并令於新開木坪站所加緊趲運一俟餉道通行
人夫齊集即便由西路轉輸以歸節省奏入報

聞

同日

上諭軍機大臣曰現在攻勦功噶爾拉賊碉首資砲力

大砲阮艱於運致必須將銅料速送軍營俾得趕鑄
應用劉秉恬已擢授總督且近駐美諾督催更為便
捷著傳諭迅即妥辦毋稍刻遲又大兵分路進攻糧
餉最關緊要此皆劉秉恬專責著即將大兵糧石酌
辦齊全加緊趲運使兩路皆得寬裕以便尅期集事
所有溫福及文綬摺俱著抄寄閱看其內地應行籌
撥續運糧石並著富勒渾留心飭屬趕辦

丁未豐昇額舒常奏言

臣

豐昇額行抵章谷有草

布什咱土司之叔丹津札布率領頭人來見據稱
我土司被索諾木殺害佔據地方今蒙

大皇帝發兵攻取思同再造現在進勒金川我等預備

正地土兵千名聽候使用

臣面加諭慰丹津札布

甚為感悅行至木池綽斯甲布土司工噶諾爾布
率伊弟索諾木旺札勒伊子綽爾甲木燦等道旁
迎接稟稱工噶諾爾布等受

天朝重恩理應隨侍軍營以供驅遣但年老殘疾願派

我子及頭人百姓等隨營助勦臣細察工噶諾爾布恐大兵不滅金川伊等日後受其荼毒今見臣等前來督辦兵威甚盛金川勢在必亡其言辭恭順似尚可信俟至攻取之日果屬奮勉臣等再行奏請酌量加恩再上舍丹津札布可否照鄂克什瓦寺土舍之例賞給土都司職銜以示鼓勵伏候

欽定奏入

上諭軍機大臣曰豐昇額等奏丹津札布願督率土兵

出力可否賞給土都司職銜著照所請行仍視其果
否感恩報効據實具奏朕從前欲於征勦之各土司
地方設營駐兵以為控制其中如鄂克什土司為人
柔軟恐不能自顧而草布什咱土司為金川所害管
束無人是以籌令俟平定兩金川後即此二處亦不
復令其管理今思鄂克什草布什咱為兩金川賊衆
所侵本屬無罪非若索諾木僧格桑之黨惡拒命斷
難寬宥者可比且鄂克什土司尚知竭力固守不肯

服順小金川而草布什咱番人於去歲官兵收復時
誠心內應殲戮金川監守之賊今復懇請自効其恭
順均屬實情若并其地撤回官辦於理尚未允協將
來添駐綠營時此兩處仍當令土司等自行管轄至
昨溫福所稱賊番碉卡多有山巒遮蔽止露碉尖係
專就一面而言其旁豈無僻逕可以攀援而上務須
留心偵訪相機妥辦毋專恃礮力為守株之見

己酉富勒渾奏言現在大兵分路進剿輓輸至為

緊要臣欽奉

諭旨隨與軍需局司道等詳查上年十二月二十五日以前西路口外卧龍關等處報存米二萬八千五百餘石南路口外章谷經斯甲布等處報存米二萬二千四百餘石此外尚有官商具報西路已運出口米一萬七千三百餘石南路已運出口米一萬餘石十二月二十五日以後又將文綬奏請採買米三十萬石內招商辦運西路米九萬石南路

米五萬二千石以上三項共計米二十二萬餘石
均飭承辦各員極力督催將存臺者交送軍營出
口者速令前進採買辦運者勒限三月內告竣務
使各路寬裕而美諾適中摠滙之地多為儲積以
備不時之需至改設臺站在在需夫現據各屬具
報應派赴美諾一千名當噶尔拉一千五百名丹
壩一千五百名均已陸續分起前往一俟全數到
站輓運充盈即將應裁者酌裁以省糜費奏入報

聞

唐戎

上諭軍機大臣曰前以兩金川賊衆恃險拒守其鎗砲火藥鉛丸等項產於何地或購自他處抑由內地偷漏各情節曾諭文綬查辦其覆奏亦未明晰而軍營所訊俘獲番衆供詞人言各殊終不知究竟茲澤旺解送到京據稱小金川素不產硫磺其鉛斤向有礦在美諾僧格宗相近之勒傳地方因開採後年歲不

好遂即封閉後來所用係購自木坪三雜谷等處至
金川向有磺廠其鉛子聞於綽斯甲布等處購買等
語因思木坪三雜谷綽斯甲布俱係內地土司兩金
川火藥即使未用兵以前陸續所購亦不能預備數
年之用其中自不無番夷偷賣情事今雖無從確詢
而小金川既全境蕩平如勒博地境果產有鉛斤硫
磺等項當即就近採辦以供軍營製配可省內地解
運之煩更屬便益著溫福劉秉恬即速查明妥辦據

實具奏至金川所用鉛子既有買自綽斯甲布之供
尤宜設法嚴禁况現由此路進兵軍火所需更關緊
要恐綽斯甲布等隨征土練將所給備用火藥鉛丸
私行省減貪利轉售則與藉冠兵而齎盜糧何異著
並諭豐昇額舒常密為查訪或有其事即當盡法懲
治以昭炯戒並著劉秉恬於附近金川賊境飭屬實
力嚴查申禁不可稍有疎懈

辛亥阿桂明亮奏言臣等於初九日統兵至納圍

納札木察看當噶爾拉形勢與前此并目等跼探
所言無異當噶爾拉以下納圍納札木以上中間
建戰碉一座尚有金川賊番潛伏臣等即令將弁
等前往衝奪賊見我兵勇銳棄此而逃聚於十四
碉內併力拒守官兵當將此碉折燬另行拏卡駐
守而十四碉形勢聯絡皆可互相援應碉外又築
有石牆圍繞甚為堅固查該處本係賊酋緊要門
戶其設備嚴密原屬意中之事此必先用大礮轟

摧方能得濟而臣等軍營所帶礮位食子均在十
觔之內現雖飭將銅觔物料迅速運營以為鼓鑄
之用而夫役亦尚不敷若俟礮成攻擊恐致稍稽
時日現在熟審機宜揔於數日間即行進取務期
殲賊奪礮庶足以壯士氣而寒賊膽奏入

上嘉之

同日

上諭軍機大臣曰阿桂等奏攻勦當噶爾拉所需鑄礮

銅斤物料夫役亦尚不敷運送等語現在大兵深入各路夫役在後運供最關緊要著傳諭劉秉恬妥速經理以資要用但所雇夫役向來多有中途脫逃者不可不加意整頓伊等既經受值即係在官之人並非白用其力若竟敢於逃避以致糧運稽延與玩悞不法無異卽當查出倡首一二人庶足懲一儆百再各處賊殲需砲轟擊者多移運既艱自宜隨地另鑄各路均應多貯銅斤以備將軍等調取倘稍有不敷

即將錢局存銅暫行借用亦無不可或將尋常施放
未加封號之砲燬棄移運亦較省便所謂急則治其
標也以上諸事劉秉恬即當實力妥辦溫福等并宜
一體留意

癸丑溫福奏言臣查功噶爾拉了口賊碉築在要
隘距官兵現駐營盤約有數里石徑既險積雪復
深必須分兵而上以成犄角之勢正月初九日臣
分派官兵即於是夜陸續進發普爾普額森特所

帶之兵奮勇直上從雪路中卡抵了口而賊碉堅固攻撲再三不能得手維時烏什哈達德爾森保等左右兩翼之兵亦俱上至山梁將賊番分之卡盡行奪獲無如賊碉鎗石如雨又山尖雪滑官兵難以直進臣為得尺得寸之計今在前者進攻在後者搬運木石分拏卡柵逼近賊碉又將已經運到之四將軍砲位儘力轟擊連夜移頭敵大營駐札於新卡搃滙要路以防賊人乘間衝刦現在嚴

寒大雪稍休兵力俟天晴趕鑄大砲以圖再舉查
此次進兵有四川馬兵減應龍首先撲礮賊番用
矛向戮該兵竟能奪取其矛反向礮間擊賊實為
奮勇臣已給予把總頂帶遇缺即補以示鼓勵奏
入

上諭軍機大臣曰溫福奏進攻噶爾拉了口情形所
辦俱合機宜惟大軍日漸深入所過後路最關緊要
雖溫福現已留心防範但止攻新卡搃滙之處其於

官軍經過後路與賊境相通應防其由僻徑抄截者
尚未籌辦著傳諭溫福擇其最要之處酌量派兵嚴
密防守使賊番無潛軼滋事方為妥協至溫福調度
得宜派往各路之領隊各員俱能不避冰雪奪得賊
碉均屬可嘉著各賞給荷包以示獎勵仍俟攻得功
噶爾拉後另行交部議叙再官軍聲勢甚大賊酋斷
不能久為支拒昨進攻小金川時原計及僧格桑當
時勢窘迫必竄金川今果不出所料將來各路會合

據其巢穴索諾木計無所之亦惟有竄逸外出而附近各土司現俱効順天朝逆酋決不敢輕往自投羅網就地圖而計索諾木必由丹墀一路突出逃往郭羅克以冀稍延殘喘丹墀土司力弱恐不能堵截自應派大員一人帶兵二三千名在彼駐防董天弼五福才力熟優著溫福於此二人中酌量派往然後奏聞並飭帶兵往駐之員祇可云聲援備調之兵不必言其所以以免漏洩轉得軼於所備之外

同日溫福又奏言查此次小金川蕩平所有四路
軍營蒙

恩議叙議卹之案俱經臣陸續造冊咨部茲當接勦金
川必須設法勸勉使士氣奮揚而土兵見小尤當
以獎賞駕馭於軍務方為有益臣思兵丁以奮勇
被創其情實堪嘉憫荷蒙

聖主優卹之恩無所不至但必俟臣等造冊送部由部
議准地方官始按數給發事隔經時該兵傷輕者

留營既調養無資傷重者遣回又長途乏費而在
營之愚兵武弁以應得之賞日久尚懸事過易忘
無所觀感臣愚以為受傷一項惟在當時查驗確
實不容將弁徇私自可不致有遺漏冒濫之失至
其賞銀將來歸地方各衙門層層查辦轉恐不免
滋弊在

國家業已施恩而各兵不能俾得實濟於鼓勵軍心
之道亦為無補臣正在熟籌辦理詢知南路有先

給養傷銀二兩之事似屬可行但傷有重輕賞分
多寡此時先行酌給亦須稍為區別臣擬將頭等
重傷者給銀三兩二三等次傷者給銀二兩四五
等輕傷者給銀一兩計自進攻金川以來歷次撲
礮拏卡受傷漢土官兵共六十九員名均經臣親
加查驗現在分別先行賞給俟部覆到日照數扣
除則此項仍非浮費奏入

平定兩金川方畧卷四十八

欽定四庫全書

平定兩金川方略卷四十九

正月甲寅劉秉恬奏言查上次進剿金川功噶爾
拉一路係在喀爾薩爾駐兵由美諾至喀爾薩爾
中間哲爾覺崇德牛廠功噶爾拉共設四站現在
將軍溫福駐兵功噶爾拉山下已距美諾三站有
餘臣昨至美諾時見此路糧運雖已辦有端緒但
臺站又設入夫未齊止有哲爾覺崇德兩站由崇

德直運軍營路多半站背夫一日不能往回是以軍營之米未能充裕令臣與鄂寶督同建昌道白瀛趕緊辦理業照舊日程途於牛廠設站並將商運米石按站給價令其直送軍營從此轉輸迅速自可異源接濟奏入報

聞

同日

上諭軍機大臣曰昨溫福奏索諾木差人遞到舊字稟

帖於僧格桑逃往金川之語全不提及轉自誇其兵力強於各土司冥頑無知已極可惡甚至請內地大臣或差官員往彼議事冀欲羈存為質公然以敵國自居尤屬狂悖不法而稟內稱其父即卡為訥木喀濟雅勒布妄誕悖逆更為覆載所不容查納木喀濟雅勒布即西番語之天汗其意以為番語非中國所能通自矜得意豈知我國家中外一統西北關地二萬餘里累譯皆通而西藏喇嘛久隸天朝凡西番字

語內地素所通曉此等鬼域伎倆其將誰欺况郎卡
么麼雜種僅若螻蟻前此大兵進勦掃穴無難朕念
其歸命投誠宥其大罪仍賞給土司郎卡尚不得擬
於天朝臣僕之列何得以天汗為稱至索諾木童年
兇悖禽獸不如乃于稟內不稱父名妄加名號又自稱
莎羅奔掌印土司而隱匿其名種種違背天理不過
自取滅亡將軍等即將朕此意繕給回文嚴切問罪
即徵末兵弁亦不可遣令前往墮其術中各路官兵

更宜迅速攻勦以靖邊氛再丹壩地界與豐昇額軍營相近尤當加意防範以備逆酋竄出即時擒縛並嚴諭郭羅克勿得藏匿致速罪戾

乙卯豐昇額舒常奏言臣等察看達爾圖山上大礮連日用砲轟摧已毀半截賊難倚恃於木寨間橫連石卡護之重濠為負隅之計臣等因現在兵力初增且日來天氣晴暖正合進勦隨遣人潛探西邊兩小路并於相對大礮之處分兵三路同時

並舉使賊不能蕪顧初十日派出領隊大臣及侍衛章京鎮將等分帶官兵於十一日子刻接踵而上直至山梁分攻附近石卡木寨并力向前祇緣濠溝既寬且雪消冰滑難以措足又有賊二三百人從東坡密林中衝出欲襲中隊官兵後路官兵一半向上抵禦一半向下壓攻殲賊多人餘俱奔竄官兵仍并力仰攻大礮_臣等察看溝卡深堅一時難以騰越徐徐撤下至日旁一路亦預飭永吉

圖永平同日進攻焚斃多賊因四面均係木卡深溝未能得手此次打仗總兵馬虎叅將西凌阿同受傷陣亡其餘傷亡兵弁另行造冊咨部至綽斯甲布土兵較前頗為出力現在工噶諾爾布之子綽爾甲布燦在營恐伊土兵退縮不時督催尚知奮勉再襄陽鎮總兵馬虎遺缺除恭候

諭旨簡放外現在軍營楚兵二千名無人統轄臣等商酌暫委叅領官達色管理奏入

上諭內閣曰馬彪自調赴軍營以來甚為奮勉此次攻打賊卡身先士卒陷陣捐軀殊堪憫惜著加恩照王廷玉李全為例交部議卹其同時陣亡之叅將西凌阿及千把外委各員並著該部查明一併議卹

上又諭軍機大臣曰達爾圖山梁既係金川要隘賊皆死守又能一舉而克其附近之日旁賊碉亦四面木卡深溝不能越過自不宜專在此一路注意急攻因思甲爾壘壩經索諾木退還現係綽斯甲布派兵駐

守正地至噶拉依約計三站路亦稍平原係溫福等
前奏擬備進兵之路今音吉圖所帶之兵既撤至豐
昇額軍營甲爾壟壩一路雖有綽斯甲布土兵不過
為自衛之計賊於此路守禦必虛莫若分兵令舒常
同音吉圖等帶往乘其不備設法襲擊或可易於得
手至豐昇額仍統兵於達爾圖攻勦牽綴賊勢使其
不疑若舒常等至彼一有進取之勢賊必撤兵抵拒
則達爾圖之賊必漸單弱豐昇額等未免過銳且令

攻勦自屬事半功倍此次進兵豐昇額等不宜過銳
且以總兵大員衝冒鋒鏑臨陣捐軀非惟可惜亦於
名聲有碍副將軍叅贊膺朕委任自不可稍存畏怯
之見朕亦深望伊等之實心勇往但見可知難為行
軍先務不可不慎豐昇額舒常俱以世臣受恩任用
其奮勉自倍常情至於臨敵之時尚宜略加持重派
遣將領亦當稍為斟酌於事應更有益再據奏砲擊
賊礮既已毀其上半何不將砲臺築令向下摧其下

半礮根及橫連十寨設或賊因避砲匿入壕溝其鎗
石勢難向下施放我兵可徑至溝邊鳥鎗火彈自上
而下更易為力彼時賊衆勢不能存必又逃出溝外
我兵隔溝密放鎗砲殲殪必多賊復何能遮攔此乃
一定之理豐昇額等何以見不及此著傳諭豐昇額
舒常妥協籌辦至舒常帶往甲爾壘壩應需兵練若
千豐昇額等於現有之兵酌量派撥仍即奏聞並將
可否如是分路進剿迅速具奏毋但以遵旨為是勉

強設施也

臣等謹案禮以惠下臣忘其死軍營鎮將受任
從征衝鋒陷陣赴義捐生是固分所當然亦發
於情之不容自己方其身先士卒何暇計及萬
全我

皇上以大員為國捐軀倍加軫惜前於薛琮被遮

諭令帶兵將領知難而退茲馬虎之歿復

諭將軍遣派將領當加斟酌

至仁不忍之意淪肌浹髓所謂死者有知足以不朽生

者感恩足以殞身所以軍營每奉

恩諭宣示無不感激涕零爭先致命也

上又諭軍機大臣曰襄陽鎮總兵馬虎陣亡所遺員缺著溫福等於軍營出力副將內揀選一員奏請陞補其副將員缺並叅將西凌阿陣亡各員缺俱著一體揀選奮勇立功之員遞行奏補以示鼓勵

丙辰

上諭軍機大臣曰川省自辦理軍務以來在營兵丁奮
勉効力者固不乏人而畏怯逃脫者亦所常有前據
舒常奏逃丁石有貴等六名隨降旨令富勒渾查辦
嗣阿除軍營亦查出逃兵張彪等四名此項隨征官
兵藐法脫逃情罪實為可惡自應迅速嚴拿立即正
法以肅軍紀所有潛逃各兵是否陸續就獲者尚有
幾名著傳諭劉秉恬富勒渾飭屬密訪拏勿得視
為通緝具文稍有疎懈劉秉恬現任美諾並宜就近

傳示軍營諭以爾等受國家豢養深恩調派進勦乃屬本分其中有勞績出衆者無不優予拔錄上進有階即間有行傷及陣亡等事亦皆厚邀賞卹澤及子孫凡在行間皆所共見共知者理應倍加感勵踴躍圖功若罔知法紀托故潛逃甘棄酬勲受賞之榮自取重罪雖至愚不應出此况此等喪良藐法之人為國憲所不貸即天理所不容從不能倖逃法網爾等當知儆懼務須互相勸戒激發天良共鼓敵愾之氣

勉成勦賊之功以冀承受渥恩榮身延世倘或迷而不悟敢蹈故轍必罹顯戮福禍利害惟爾等自擇之如此明白曉諭該兵丁等自必更知所儆畏不致復萌免脫之念矣

丁巳軍機大臣奏言現在川省軍營滿漢大小將弁奮勉自効者甚多所有缺出似應俱令該將軍等揀選打仗出力之員奏明遞次補用兵部毋庸開缺請簡統候大功告成再行照舊辦理奏入

上從之

同日富勒渾奏言承准軍機處遵

旨將文綬覆奏每月軍需銀兩交

臣

再行確查具奏

臣

查文綬原奏清單所開糧米與鹽菜月餉工食并

夫役工價及驛站馬匹等四項每月需銀七十四

萬餘兩既係約計之數而所開一切雜款需餘十

餘萬兩更非按月常有之事當即轉飭軍需局分

款詳查茲據布政使錢瑩等稟稱雜款一條內如

滿漢屯土官兵借支行裝俸餉夫匠安家以及軍
營賞費卹銀沿途應付夫馬鹽菜口糧製備鍋帳
採買馬匹火藥硝磺修砌石城木柵橋道採辦鉄
炭口袋苫單修建倉房夫棚租賃礮房製造砲位
等項原係零星雜款並非每月常需原奏列入月
費項下實屬錯銀至月費七十四萬餘兩亦係按
照彼時在營在站官兵丁役夫匠以及添設軍營
馬匹數目約畧核計並非將來實在報銷之數緣

自軍興以來各路標管借支行裝裹帶馬價俸餉
並各州縣請領採買米糧腳價催募長夫安家費
用以及撥交各站總理臺員銀兩俱係陸續支發
長短不齊其中有支領不敷尚須找發者亦有支
領寬裕事竣仍須繳還者必須各員報銷到日核
明應准應駁方有確數等情臣復飭將自軍興以
來司中逐月撥協支發並各員逐月領用各銀數
開單細核其中有照依成規給領者亦有因臺站

夫糧緊急隨時酌量給領者有已經

奏咨亦有尚未奏咨者而領用各員有將用項隨時
報明者亦有尚未造報者所辦既未畫一則頭緒
糾紛益難查核臣思軍需款項雖繁而一切支應
自有定則即或因地制宜不得不量為變通亦應
隨時分別咨

奏使部內有案可稽而領用各員不能絲毫冒濫方
為慎重錢糧臣現在會同督臣劉秉恬嚴飭司道

等及在營在臺各員將已經支發領用銀一千二百三十八萬三千五百餘兩詳細確核分別有定款有定數應照例作正准銷者若干有定款無定數應咨部核明准銷者若干無定款無定數應奏明請

旨准銷者若干按款覆核陸續

奏報如有浮多之處即令承辦各員賠補並飭隨營在站總理各員自本年正月以後將領用銀兩按

月造具管收除在四柱清冊並註明何項係照例
動支何項係變通動用報明藩司及軍需局臣等
會同

奏咨以備查考如此則辦理既有定規而考核亦歸
簡易以奏入

上勅原議大臣議奏旋經軍機大臣等議覆應如該督
所定章程妥速清釐畫一辦理毋得如前含混致
滋冒濫

上從之

戊午

上諭內閣曰阿桂著補授禮部尚書阿桂未到任以前著素爾納署理

己未阿桂明亮奏言

臣

等統領官兵前抵當噶爾

拉相機進取茲於十四五等日風雪連綿至十七日始行開霽臣等進兵之路本任陽坡雖早晚永凌堅滑然於兵丁行走進攻尚無大碍惟是當

噶爾拉山高路峭官兵雖俱踴躍思奮而從納圍
納扎木進抵梁上賊碉尚有二十餘里步步仰攻
究不免於疲頓臣等令各領隊及鎮將等將營卡
逐日上移今距賊碉不過二三里所鑄食十六觔
子之大砲已於十八日造成其三四號砲位亦陸
續運到查賊碉堅固用砲轟摧愈近愈為得力第
既逼近賊碉必須建設木城防護庶砲力猛而有
準我兵亦不致多傷但此山並無木材臣等督令

官兵於他處密行砍伐運送並令辦就攜牌火彈等物即於二十一二日間分兵三路一面直前進攻於對敵之際搶立砲柵一面潛師越溝攻奪靠西一帶山梁賊礮務期得手總之當此進兵伊始非即破礮掘地示以懲創不足以寒賊膽臣等惟有督勵漢土官兵奮速進剿

阿桂明亮又奏言革布什咱各處防兵本可量為裁撤前據各將領等酌議具稟臣阿桂復訪詢熟

悉情形之將弁土人詳加籌度除甲爾壘壩本係
綽斯甲布之地逆酋業已遣兵佔據毋庸另派官
兵駐守其甲魯與甲爾壘壩本係一道山梁相去
不遠令應派駐兵五百名令其彼此聲援並令駐
守甲爾壘壩之土兵與甲魯之兵每日巡查會哨
則聲勢既為聯絡仍可牽掣賊人其自吉地前往
甲魯丹東綽斯甲布之各隘口及自格藏橋以至
吉地丹東一帶臺站亦均視地方之緊要與否以

定駐兵之多少共應留漢兵七百九十名土兵一千名令叅將吳錦江卽擢升等分段管理以專責成查革布什咱一路現存可用川黔陝甘官兵三千八百餘名其各處土兵亦共有三千八百餘名今革布什咱各隘除酌留防範外所餘各處土兵內其德爾格忒等馬上番民一千八百餘名登山越險本非所長均應撤歸游牧以節糜費並可派出烏拉供運軍糧其餘革布什咱番民尚為勇健

前據伊頭人派出一千隨營打仗今扛分撥三百名留守甲魯各隘餘令赴當噶爾拉大營聽用其屯練一百餘名明正噶密達巴士兵四百名亦俱可用並令來營聽候調遣至應行撤回之川兵一千五百餘名查馬奈馬爾邦係乾隆十二三年進勦金川之路亦係巴旺布拉克底與金川交界之所後路即通格藏章谷等處自應設兵駐守以分賊勢即於此項川兵內酌派一千名同巴旺布拉

克底土兵四百名令汪騰龍帶領往彼駐札所餘
川兵五百餘名歸入當噶爾拉一路軍營其應撤
回之貴州兵四百餘名查係總兵王萬邦所帶數
內今當噶爾拉大營僅存六百餘名自應將此四
百名一併歸入以便調用至所餘陝甘兵一千一
百餘名本係副將常秦等帶領來川之兵今常秦
已帶陝甘官兵現駐綽斯甲布此項陝甘兵丁亦
應前赴該處軍營併為一隊且豐昇額等一路現

雖有兵一萬五千餘人但丹壩逼近金川該處或應稍添兵力以綴賊勢或新設糧臺須兵防護得有此項官兵自足以資分撥至臣當囑爾拉一路僅有漢土官兵一萬二千餘名今既增入川黔及屯練革布什咱明正嚕密達巴等土兵一千九百餘名及新降番人八百餘名合之原有進剿之兵已有一萬五千餘名與綽斯甲布一路官兵數目相等於軍營聲勢亦為有益均奏入

上諭軍機大臣曰阿桂等奏進兵伊始非即破碉奪地
示懲行創不足以寒其膽所見甚是官兵勦賊遇應攻
擊之時固不宜過於持重稍示怯弱然初次進攻接
仗若不審度合宜奮擊得利大挫其鋒不能振我軍
威使賊望而生畏今大砲既已鑄得定於廿一二分
兵進攻自可尅期制勝佇聽捷音又阿桂另摺奏革
布什咱一路漢土官兵除酌留駐守隘口外其各處
土兵分別調撤昨因豐昇額等所攻達爾圖日旁一

路賊礮猝難進取因思甲爾壘壩至正地一帶亦係
溫福原定各路進兵之路且稱其地稍平欲令舒常同畫
等帶兵由此前往已傳諭豐昇額等熟審情形是
否可行就近妥酌辦理並著傳諭溫福阿桂一併詳
議其現擬裁撤之革布什咱一路土兵應否添撥交
舒常等備用並著阿桂籌核妥辦

二月庚申

上諭軍機大臣曰朕閱阿桂前奏知索諾木年幼昏愚

俱係伊兄弟喇嘛莎羅奔等處其印信號紙各思逞
強攘奪而頭人內又有黨惡創謀之徒為之主持以
致助兇拒命存留首逆僧格桑種種獲罪是索諾木
情尚可原即該處番民原未必盡皆莎羅奔等羽翼
特彼刼脅驅迫遂不自主亦殊堪矜憫著傳諭溫福
等繕寫檄文曉諭索諾木令其擒獻首逆僧格桑並
為逆之兄弟頭人等率眾歸成自求多福毋徒受人
牽白自取滅亡

辛酉溫福奏言竊臣欽奉

諭旨詳示防範後路機宜查上年臘底臣自布朗郭宗

進兵時撥兵二千餘名交與董天弼令其于布朗

郭宗底木達美臥溝大板昭等處應行防守各隘

妥為分駐至臣帶領征兵由帛噶爾角克之北簇

拉角克之南過翁固達大山下坡即達巴溝站名

崇德該處為美諾布朗郭宗簇拉角克帛噶爾角

四通之路形勢緊要當即派兵四百名令都司馬

良棟帶領駐扎過此而北有地名松林口該處林
箐深險旁通簇拉角克大溝山路叢雜賊匪最易
潛踪且為功噶爾拉大營切近之后路當即派兵
百名令副將多隆武帶領駐扎再自達巴溝起直
至功噶爾拉山一帶東面大山道路綿亘兩金川
來往小路甚雜賊或于此潛來窺擾亦不可不防
已酌派兵七百餘名相度形勢設卡分駐以上各
處係臣現在進剿大兵後路如攻過功噶爾拉則

情形又異應留應撤再行審量妥辦奏入報

聞

同日溫福劉秉恬奏言查自布朗郭宗底本達直至丹壩地與金川犬牙相錯其間深林仄逕在在可通誠如

聖諭此等要隘之處我進較難賊來甚易自應加意嚴防已令董天弼於養傷兵內擇其痊愈者即留為該處分防之用至美諾係小金川舊巢又糧運總

匯之地雖有松潘鎮總兵五福在彼駐扎從前並未留兵臣溫福擬於進勦兵內暫抽二百名再于各站護糧兵內通行減撤約可得三百名二共兵五百名令赴美諾正在籌辦具奏間仰蒙

聖訓

臣

劉秉恬現即逕赴布朗郭宗一帶與董天弼詳

細熟籌妥為經理至丹壩地方為曾頭溝一路通金川要隘從前曾派兵七百名在彼堵禦應否再添兵力之處董天弼稔悉彼中道里情形容臣劉

秉恬到彼細商定局奏入報

聞

同日劉秉恬鄂寶奏言查現在大兵已抵功噶爾
拉距牛廠二十里今自牛廠安站之後數日以來

兵糧到營者已漸充裕至當噶爾拉一路

臣劉秉

恬在僧格宗時亦經辦有章程而木坪商米已於

十二月二十八日等陸續起運尅日抵營足敷接

濟再綽斯甲布兵糧由打箭爐轉運者

臣

劉秉恬

仍嚴飭各員極力赶運不得以雪大山封藉口遲
滯其由丹壩一路轉運者程站本較打箭爐為近
現擬辦理綽斯甲布糧務之知府盛英等稟稱此
路糧站已有頭緒臣等又節次屢催務期赶運無
悞奏入

上嘉之

壬戌

上諭軍機大臣曰近聞西藏所用鐵鍋因彼處地勢較

高不宜鑄造皆由他處鑄成運送推原其故或因高處多風鑄造不能堅固亦未可定礮之與鍋雖係兩物而范金則同溫福等所鑄之礮每易炸壞諒以番境鮮有平地而溫福等又不知此理總於山上鑄造徒費物材不濟於用朕深為繫念著傳諭溫福阿桂豐昇額等此後鑄巨礮須擇卑下少風之地妥為成造

臣等謹按軍行利用火器為先况摧礮尤資大

礮如所鑄砲位施放炸損關係甚重此固由
銅質淘鍊未純而以西藏造銅之銳推之則鑄
坂必擇地宜實為至理我

皇上體察精微推類以原其故申

命軍營妥擇善地仰見

宵旰憂勤無微不至嗣後得稟承

睿筭軍器倍加堅利矣

癸亥

上諭軍機大臣曰昨偶閱平定金川方畧內載副將張興邦在馬邦失陷一條稱賊有石礮法安設木架以機發石傷人所及不過百步而木架一著鎗砲即倒乃官兵並不施放鎗砲擊毀木架任其安設以致失利等語石塊體質沉重本難及遠即以機發石亦止二三十步斷無能及百步之理況賊番木架可用鎗砲轟摧尤屬易制其所云可及百步者必係當日綠營怯誑之習張大其詞耳第金川賊番既有此用機發

石之法我兵現在進剿不可不知倘見賊寨設有木架即當相度遠近用鎗砲一概擊毀其機石自無所施斷不可因賊寨有此伎倆稍生畏怯也亦不可不設法防範著傳諭溫福等知之

乙丑豐昇額舒常奏言

臣

等以達爾圖山梁為金

川門戶賊寨死守仰攻無益是以選派官兵砍伐木植於正月十八日等日趕拿木寨已建大木寨四座外刨深溝內貯土袋防其刼掠攬其鎗砲並

飭令官兵嚴謹守獲約計相距賊寨不過一箭之路籌議攻取之日先用大砲轟摧繼以四寨伏兵突出使賊堵禦不暇非惟可省兵力亦可一舉得手奏入報

聞

同日豐昇額舒常又奏言

臣等欽奉

諭旨以金川番賊狡謀更深必須防範後路仰見

聖慮周詳臣等悉心規畫查綽斯甲布一路因通金川

道路甚多已將宜喜軍營原存漢土兵內共派撥三千餘名駐守各處糧臺以及後路隘口現在宜喜軍營實存進勦漢兵三千九百餘名緡斯甲布土兵一千九百名臣豐昇額帶來漢土官兵六千名內除原派駐守丹壩漢土兵七百名之外實存進勦漢兵三千七百餘名三雜谷土兵一千五百餘名共計宜喜日旁兩營進勦漢兵七千六百餘名土兵三千四百餘名臣等謹遵

聖訓現派副將董果稽查後路毋致稍有疎虞奏入報聞

同日豐昇額舒常又奏言查駐劄覺木交糧員巡檢王嘉猷稟稱昨日戊刻行至泥峙岡途中樹林內有十數賊突出當經官兵全來援應將賊擊退惟護糧兵丁王禮一名陣亡等語臣等隨嚴飭各處隘口務須日夜加謹防範倘有賊人潛出惟當竭力盡殲以喪其膽毋致稍有疎虞奏入

上諭軍機大臣曰豐昇額等奏巡檢王嘉猷遇賊一摺
因思昨歲舒常亦曾奏及十二月初三月初四初九
十一等日並有賊在林澗中潛匿圖竊牛馬糧臺實
屬不成事體西南兩路官兵經過之後並無此等情
事獨此路屢有賊衆潛出滋擾諒必由綽斯甲布而
來其事甚有關係不可不留心防範亦不可稍露端
倪為番衆窺測至後路嚴密防查實為第一要義雖
豐昇額等現派副將董果在彼專司但此等巡防要

務恐綠營循分供職之員尚不足恃劉秉恬現駐美
諾經理糧運軍臺伊係現任總督呼應甚靈無須鄂
寶協助著鄂寶即速前往綽斯甲布軍營後路帶兵
駐守並催趲糧運設有此等賊匪潛出即督官兵痛
加殲戮俾其知所畏懼庶豐昇額等於進攻達爾圖
一帶賊寨得以乘勝深入無後顧之虞方不致時屢
朕念至豐昇額等進攻之路從前不過牽綴賊勢今
此路既須一併攻勦所有兵力似覺稍單其應作何

抽撥之處並著傳諭溫福阿桂劉秉恬通盤籌畫妥
協辦理奏聞

平定兩金川方畧卷四十九